

Ням гарагийн үдээс хойших хуралдаан

2011 оны 4-р сарын 3

Үндэстнүүдийн төлөө өргөх туг

Арванхоёр Төлөөлөгчийн Чуулгын

Ахлагч Жеффри Р.Холланд

Энд дуулсан дуоллуудын үг бүр нь, ах эгч нарын минь хэлсэн үг болгон нь миний сэтгэлийг ихэд догдлуулж, хэлэх үгийнхээ төлөө намайг залбирахад хүргэлээ.

1846 оны өвөл Ерөнхийлөгч Бригам Янг Наувугаас явахынхаа өмнө, нэгэн шовх оройтой толгой дээр зогсоод тэртээ доор харагдах хөндийд Баруун зүгт зааж байгаа тэнгэр элчийг зүүдэндээ үзсэн байна. Тэрбээр 18 сарын дараа Давст нуурын хөндийд анх удаа ирэхдээ бидний одоо цуглараад байгаа газраас холгүй орших толгодыг хараад, тэрхүү толгод нь түүний үзэгдэлд харсан толгод мөн болохыг таньжээ.

Бригам ах цөөхөн удирдагчидтай уг толгод дээр цуглаан хийсэн бөгөөд орчин үеийн Израилын угсааныханд шашны гүн утга агуулсан “Ensign Peak” – Тугийн Оргил хэмээх нэрийг өгчээ. Хоёр мянга таван зуун жилийн тэртээ бошиглогч Исаиа “Эзэний өргөөний уул нь уулсын тэргүүнээр тохоогдон ...Тэр үндэстнүүдийн төлөө тугийг өргөнө” хэмээн тунхаглаж байсан юм.¹

Толгод дээр цугласан ах нар тэдний амьдарч буй үе нь тэрхүү бошиглолын биелэл болж байгааг ухааран “Тэр үндэстнүүдийн төлөө тугийг өргөнө” гэх санааг илэрхийлэхийн тулд туг босгохыг хүсчээ. Ахлагч Хебер С.Кимбалл шар өнгөтэй алчуурыг авч, Бригам ах, Ахлагч Виллард Ричардсын таяганд уг алчуурыг уяад туг болгон хийсгэжээ. Тэрээр агуу Давст нуурын хөндий, түүнийг хүрээлэн буй уулс нь хожмын үед Их Эзэний үгс дэлхий дахинаа урагш гарч ирнэ хэмээн бошиглогдсон газар мөн болохыг тунхаглажээ.

Ах, эгч нар аа, хагас жил тутам явагддаг энэхүү ерөнхий чуулган болон бусад чуулганууд нь тэр үед дэлхийд зарласан тунхгийн нэгэн хэсэг юм. Өнгөрсөн хоёр өдрийн цуглаан

маань нэгэн дуулалд өгүүлсэнчлэн: “Харагтун, Сионы туг намирч байна”² гэдгийн болон “Туг” хэмээх үгийн хоёр өөр утгыг илэрхийлж байна. Бидний ерөнхий чуулган дээр хэлсэн үгсийн англи хувилбар нь The Ensign буюу Туг гэдэг сэтгүүлд хэвлэгдэн гардаг нь тохиолдлын хэрэг биш ээ.

Чуулган өндөрлөх тийшээ хандаж байна. Иймээс би та бүхнээс нэгэн зүйлийг хүсье. Чуулганы дараа зөвхөн сонссон зүйлийнхээ талаар тунгаан бодоод зогсохгүй чуулган ямар гайхалтай үйл явдал болох мөн Хожмын Үеийн Гэгээнтэн бид энэхүү чуулганы ач холбогдол, үүгээр дамжуулан бид дэлхийд юуг түгээж, юуг харуулахыг хүсдэг талаар бодоод үзээрэй. Бид бүх үндэстэн, ястан, хэлтэнд хандан Бурхан зөвхөн амьд төдийгүй, бидэнд хандан ярьдаг гэдгийг, энэ үе, өнөөдөр бидний сонссон зөвлөмж бол Ариун Сүнсний удирдамжаар өгөгдсөн “Их Эзэний таалал... Их Эзэний үгс... Их Эзэний дуу хоолой.. мөн аврал дахь Бурханы сүр хүч...” мөн гэдгийг гэрчилж байна.³

Чуулганд үг хэлэхээр томилогдсон хүмүүс онцгой тохиолдлоос бусад үед үг хэлэх сэдвээ өөрсдөө сонгодог гэдгийг та бүхэн мэддэг байх. Мэддэггүй байсан бол одоо мэддэг боллоо. Үг хэлэхээр томилогдсон хүмүүс энэ цаг үед, энэхүү чуулганаар тэдний хэлэх үг нь Их Эзэний хэлээсэй гэж хүсч байгаа тэрхүү үг мөн гэдгийг баттай мэдэх хүртлээ тус бүрдээ мацаг барьж залбиран, судалж мөн хайж, хэлэх үгээ бэлдэж, дахин дахин эхнээс нь эхэлдэг билээ. Ерөнхий чуулганы арван цагийн турш үг хэлж байсан хүн бүр энэ бүгдийг хийсэн юм. Хүн болгон нулимс дуслуулан, санаа зовон байж, бодол санаа, хүсэл эрмэлзлээ чиглүүлж өгөхийг Их Эзэнээс чин сэтгэлээсээ хүссэн билээ. Бригам Янг энэ газарт зогсож байсан тэнгэр элчийг харсан шиг би одоо тэнгэр элчүүд энд зогсож байгааг харж байна. Ах, эгч нар минь, Сүмийн ерөнхий удирдагч нар ингэж дуудуулахдаа тийм ч таатай биш байж магадгүй гэсэн ч би тэднийг ингэж л харж байна. Тэд тэнгэр элчийн мэдээг та нарт хүргэж буй мөнх бус элч нар юм. Та бидэнд тулгардаг эрүүл мэнд, санхүү, гэр бүлийн асуудлууд тэдэнд ч мөн ялгаагүй тулгардаг ч тэд итгэлтэйгээр өөрсөддөө ирсэн дуудлагыг биелүүлж, өөрсдийнхөө бус харин Бурханы үгийг тунхаглахад амьдралаа зориулж буй хүмүүс юм.

Мөн та нар хүлээн авч байгаа олон янзын мэдээллээ анзаараад үзээрэй. Тэдгээр нь тэнгэрээс ирсэн удирдамж ба шууд бидэнд өгөгдөж байгаа нь гайхалтай. Гэвч яагаад ийм олон янзын мэдээлэл байна вэ? Энд болон цуглааны байруудад цугласан хүмүүсийн ихэнх нь Сүмийн гишүүн байгаа. Гэвч хараахан Сүмийн гишүүн болж амжаагүй олон

хүн чуулганыг сонсож байна. Тиймээс биднийг маш сайн мэддэг мөн биднийг огт мэддэггүй хүмүүст бид хандан ярих шаардлага гардаг. Сүм дотроо л гэхэд хүүхдүүд, өсвөр насныхан, залуу насанд хүрэгчид, дунд насныхан болон ахмадууддаа хандаж ярих хэрэгтэй болдог. Бид гэр бүл, эцэг эх, гэртээ байгаа хүүхдүүдэд хандахын сацуу ганц бие, хүүхэдгүй, магадгүй гэр орноосоо хол байгаа хүмүүст бас хандан ярих хэрэгтэй болдог. Ерөнхий чуулганы туршид бид итгэл, найдвар, хайр⁴ ба цовдлогдсон⁵ Христийн талаарх мөнхийн зарчмуудыг онцлон анхаардгийн сацуу өнөөдөр бидэнд тулгараад байгаа ёс суртахууны асуудлуудын талаар ч шулуун шударгаар ярьдаг билээ. Судруудад “энэ үеийнхэнд наманчлалаас өөр юу ч бүү ярь”⁶ гэж тушаасан байдаг ч бидэнд бас “зовогсдод сайн мэдээг дэлгэрүүлэх [мөн] шаналсан зүрхтэй хүмүүсийг эдгээх”⁷ ёстой гэж хэлсэн байдаг. Чуулган дээр хэлсэн эдгээр үгс ямар ч үед “боолчлогдогсдод эрх чөлөөг тунхаглаж, Христийн нэвтэршгүй баялгийг”⁸ түгээж байдаг. Эдгээр олон янзын үгсээс хүн болгон өөрт хэрэгтэй тэр хэсгийг олж авдаг юм. Нэлээд хэдэн жилийн өмнө Ерөнхийлөгч Харольд Б.Лий үүнийг хамгийн оновчтойгоор сайн мэдээ бол “тавгүйтсэн нэгнийг тайвшруулж, тайвширсан нэгнийг тавгүйтүүлэхийн тулд юм”⁹ гэж тодорхойлжээ.

Бид ерөнхий чуулган дээр өгдөг зааварчилгааг үргэлж Христийнхтэй адил эелдэг мөн найрсаг байлгахын сацуу түүний захиасуудад байнга гардаг нэгэн зарчмыг давхар санаж байхыг хичээдэг билээ. Есүс хамгийн агуу сургаалаа эхлэхдээ “сүнсэн дотроо ядуу, зүрхэн дотроо цэвэр ариун, амар тайвныг тогтоогч болон дөлгөөн хүмүүст”¹⁰ амлагдсан бидний хүсэмжилж байдаг гайхалтай сайхан адислалуудыг тоочдог. Тэдгээр ерөөл адислалууд нь хэчнээн агуу хийгээд бодгальд ямар агуу тайвшралыг авчирна вэ! Мөн эдгээр нь үнэн юм. Аврагч маань яг энэ сургаалдаа амар тайвныг тогтоогч болон дөлгөөн хүмүүсийн зам нь цаашлах тусам хэчнээн нарийн болдог тухай бас өгүүлдэг. Тэрбээр “Хүн алж болохгүй гэж эртний хүмүүст айлдсаныг та нар сонссон” гэдгийг онцлоод “Гэвч Би та нарт хэлнэ, ахдаа уурласан хэн боловч шүүлтийн дор аюултай байдалд байх болно”¹¹ гэсэн байдаг.

Үүнтэй адил “Завхайрч болохгүй гэснийг та нар дуулсан. Харин би та нарт хэлье, эмэгтэй хүнийг тачаадан харах хүн бүр зүрхэндээ түүнтэй хэдийнээ завхайрсан хэрэг юм”¹² гэжээ.

Үүнээс харахад бидний итгэл нэмэгдэх тусам бидний өмнөх зам улам нарийсч, нэгэн өдөр хамгийн агуу шаардлага болох “Тиймээс тэнгэрлэг Эцэг тань төгс байдаг шиг та нар мөн төгс бай”¹³ гэх төвшинд биднийг аваачна гэдгийг Ахлагч Кристофферсон саяхан хэллээ. Эхэн үедээ амархан мэт байсан ч бид жинхэнэ утгаараа дагалдагч болох цагт сайн мэдээ нь биднээс маш ихийг мөн хүнд хүчрийг шаардаж эхэлдэг юм. Хэрэв та Христ нүгэл хийх нь зүгээр хэмээн заасан гэж бодож байвал эндүүрч, судрыг сайн ойлгоогүй байна гэсэн үг. Христийн дагалдагч байна гэдэг нь түргэн хоолны газартай адил биш бөгөөд бид хүссэн бүхнээ хийж болно гэсэн үг биш. Нэг л өдөр өвдөг *бүхэн* сөхөрч, хэл бүр Есүс бол Христ, Аврал зөвхөн *Түүгээр* ирнэ гэдгийг тунхаглах болно.¹⁴

Ерөнхий чуулганаас та амьдралыг тань чиглүүлэх эсвэл тайвшруулах үгсийг эрэлхийлэхдээ, бидний үгс хэчнээн хатуу, шулуухан санагдсан ч бид хүн бүр садар самууныг үйлдэж, гэр бүлээсээ салж, ёс бус бэлгийн харьцаанд ордоггүй гэдгийг мэддэг юм шүү. Хүн болгон Хүндэтгэлийн өдрийг зөрчиж, худал гэрчлэл хуваалцаж эсвэл ханилсан ханиа дээрэлхдэг юм биш шүү. Биднийг сонсож буй хүмүүсийн ихэнх нь эдгээрийг үйлддэггүйг бид мэддэг хэдий ч иймэрхүү ёс бус үйлдэл гаргадаг нэгэнд дэлхийн хаана ч байсан анхааруулах ариун үүргийг бид бас хүлээсэн байдаг юм. Иймээс хэрэв та нар чадах бүхнээ хийдэг бол жишээлбэл: бага насны хүүхдүүд тань сахилгагүйтэж, салхи мэт гүйлдэн, харайлдаж байхад нь та яаж ийгээд гэр бүлийн үдшээ хийхийг хичээдэг бол гэр бүлийн үдшийн талаар биднийг ярихад өөрсөддөө сэтгэл хангалуун байж болно. Харин та нарын тийм ч сайн хийж чаддаггүй өөр сэдвийг хөндвөл түүнээс суралцаж, удирдамж авахыг хичээгээрэй. Бид Сүнсээр зааж, та нар Сүнсээр хүлээн авч байгаа тохиолдолд бидний хувь хүн бүрт хамаатай, хувийн чанартай бошиглолыг зөвхөн өөрт тань зориулан илгээх болно.

Ах, эгч нар аа, ерөнхий чуулганаар бидний гэрчлэл бусдынхтай нийлж Бурханаас та нарт сонсохыг хүсч байгаа дуу хоолойг бид ямар нэг аргаар *хүргэх болно*. “Хүмүүст гэрчлэх хийгээд сэрэмжлүүлэхээр би та нарыг илгээсэн билээ” гэж Их Эзэн бошиглогч нартаа хэлсэн юм.¹⁵

“[Учир нь] та нарын гэрчлэлийн дараа ... газар хөдлөлтүүдийн гэрчлэл ирэх болой ... мөн аянгын ... мөн гялбааны ... мөн шуургануудын ... мөн өөрсдийгөө зааг хязгаараасаа халин шидлэх далайн давалгааны дуу хоолойны гэрчлэл ирэх бөлгөө...

Мөн тэнгэр элчүүд чанга дуу хоолойгоор хашгиран, Бурханы бүрээг дуугаргана”.¹⁶

Энэ индэр дээрээс ярьсан тэнгэр элч болгон өөр өөрсдийнхөөрөө “Бурханы бүрээг дуугаргасан” болно. Тэдний өгсөн захиас бүхэн нэг ёсны хайрын гэрчлэл бөгөөд сэрэмжлүүлэг юм, энэ эцсийн үед байгаль дэлхий хүртэл гэрчилж мөн сэрэмжлүүлэх болно.

Хэсэг хугацааны дараа Ерөнхийлөгч Томас С.Монсон энэ чуулганыг өндөрлөхөөр индэр дээр гарч ирнэ. Бидний амьдарч буй өнөө үеийн ахлах Төлөөлөгч, бошиглогч, энэхүү гайхалтай ахын талаар хэдэн үг хэлэхийг зөвшөөрнө үү. Энэ чуулган дээр та бүхний сонссон бүх зүйл, бошиглогчдын амьдрал тийм ч амар байдаггүйг харууллаа, би ч бас үүнийг батлан хэлж байна. Ерөнхийлөгч Монсонгийн амьдрал ч мөн амар хялбар байсангүй. Тэр энэ тухайгаа өчигдөр орой санваартны хуралдаан дээр ярьсан шүү дээ. 36 настайдаа тэрээр төлөөлөгчөөр дуудагдахад хүүхдүүд нь 12, 9, 4 настай байжээ. Монсон эгч нөхрөө, хүүхдүүд нь аавыгаа амьдралынхаа хагас зуун жилийг Сүмд зориулж, сүмийн үүргүүдийг биелүүлж ирснийг нь харлаа. Тэд энэ дэлхийд хүн болгонд нүүрлэдэг өвчин зовлон, өгсөж уруудахын хүнд хүчрийг даван туулсаар ирсэн, цаашид ч даван туулах болно. Гэвч энэ бүхний дунд Ерөнхийлөгч Монсон маань инээмсэглэн бүхнийг даван туулж байна. Түүнийг юу ч зогсоож чадахгүй. Тэр бол агуу итгэл, ер бусын тэвчээр, сэтгэлийн хаттай хүн.

Ерөнхийлөгч өө, энд байгаа болон дэлхий даяар цуглаад байгаа ах, эгч нар бид бүгдээрээ Танд хайртай, Таныг хүндэлдгийг би батлан хэлж байна. Таны үнэнч шударга зан бидэнд үлгэр жишээ болдог. Таны удирдлаганд бид талархаж байна. Төлөөлөгч болох бусад арван дөрвөн ах, энэ индэр мөн танхимд сууж байгаа удирдагчид, дэлхий дахинаа цуглараад байгаа олон мянган хүн таныг хайрлаж, дэмжин баталж, тантай мөр зэрэгцэн энэ ажлын төлөө зүтгэж байна. Бид чадлынхаа хэрээр таны ачааг хөнгөвчлөх болно. Ертөнц үүсэхээс өмнө энэ дэлхийд Есүс Христийн сайн мэдээний тугийг өргөхөөр дуудагдсан тэнгэрлэг элчүүдийн нэг нь та юм шүү. Таныг хараад бид бахархдаг. Бидний тунхаглаж буй сайн мэдээ болон түүгээр дамжин ирдэг авралыг, мөн Тэрбээр энэхүү авралаар хангасныг би Их Эзэн Есүс Христийн гайхамшигт, сүр жавхлант нэрээр гэрчилж байна, амен.

Эшлэл

1. Исаиа 2:2; 11:12.

2. “The Morning Breaks,” *Hymns*, no. 1.
3. Сургаал ба Гэрээ 68:4.
4. 1 Коринт 13-ыг үз.
5. 1 Коринт 1:23-ыг үз.
6. Сургаал ба Гэрээ 6:9; 11:9.
7. Исаиа 61:1
8. Ефес 3:8
9. Харольд Б.Лий, “The Message,” *New Era*, Jan. 1971 оны 1-р сар, 6-г үз.
10. Матай 5:3-12-ыг үз.
11. Матай 5:21-22; мөн 3 Нифай 12:22-ыг үз.
12. Матай 5:27–28.
13. Матай 5:48
14. Ром 14:11; Мозая 27:31-ийг үз
15. Сургаал ба Гэрээ 88:81.
16. Сургаал ба Гэрээ 88:89-90, 92.